

Persisi: 15 jenis silat ditanding dalam Pesta

1 PENCAK SILAT 2

SEBANYAK 15 jenis silat akan dipertandingkan dalam Pesta Silat Kebangsaan 1981 anjuran Persekutuan Silat Singapura (Persisi) — yang pertama dianjurkan di sini.

Dalam pesta pada 28 dan 29 Ogos ini, kesemua 11 kerabat Persisi akan mengambil bahagian. Ia akan diadakan di Dewan Badminton Singapura.

Sebelum ini Persisi hanya mengadakan demonstrasi silat tahunan sejak ia ditubuhkan pada 1976 lalu.

Menurut Setiausaha Persisi, Encik Johari Uriff, antara silat-silat yang akan dipertandingkan nanti ialah *Alhak, Kuntau Melaka, Seni Gayung, Macan Pasrah, Seligi Tunggal, Cekak, Gerak 17, Pancar Sakti, Sendeng Belalang, Kuningan, Kerincingan, Baweang Asli, Pencak Sunda, Harimau dan Esha*.

Encik Johari menerangkan, bila Persisi menganjurkan demonstrasi silatnya pada tahun-tahun lalu, ia telah menekankan usaha untuk meninggikan taraf silat dan menjadikannya sebagai sukan yang digemari ramai dari semua lapisan masyarakat, sebagai matalamatnya.

Periksa kesihatan

Bagaimanapun, perkara kedua — untuk menjadikannya sebagai satu bidang sukan — kurang dititikberatkan. Disebabkan itu, langkah-langkah telah diambil untuk menonjolkan kegiatan ini sebagai olahraga yang sihat, beliau menekankan.

Beliau juga berharap pesta yang akan dianjurkan itu nanti akan mendapat sambutan hangat dari orang ramai seperti yang telah ditunjukkan dalam acara-acara demonstrasi mempertahankan diri anjuran Persatuan Jurulatih Mempertahankan Diri Singapura di Gay World, baru-baru ini.

Pertandingan tersebut terbahagi kepada dua bahagian — untuk pesilat remaja yang berusia dari 14 hingga 18 tahun, dan pesilat dewasa dari 18 hingga 30 tahun. Ia terbuka kepada lelaki dan wanita.

Setiap peserta dinasihatkan menjalani pemeriksaan kesihatan sebelum menyertai pertandingan tersebut. Berat badan mereka juga akan diambil sebelum mereka dibenarkan menyertainya.

Sebanyak 60 hadiah berupa trofi dan pingat akan dianugerahkan kepada para pemenang. Tiket-tiket berharga \$2 dan \$3 akan dikenakan untuk menyaksikan pertandingan itu.

Encik Johari juga memberitahu bahawa sebelum pertandingan itu, satu perlawanan saringan akan diadakan dari 15 hingga 20 Ogos ini di Gelanggang Seri Temasek di Eunos Crescent.

Beliau juga menerangkan, sebagai acara selingan, beberapa pertunjukan silat dari pesilat tempatan dan Malaysia, akan juga dipersembahkan. Pesta yang akan berlangsung selama dua malam itu akan dimulakan pada 7.30 malam selama kira-kira tiga jam setengah.



ENCIK JOHARI